



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 8

**Taoba Thai ato kilonser  
Thaksin nem bail agütsüogo**

**ICC Women's ODI batting  
rankings: Smriti 3bubai tuogo**



VOL. XXI ISSUE NO. 247 (ADOK 247) DIMAPUR RASEMNU (WEDNESDAY) AAMI (JUNE) 19, 2024 ₹ 5.00

## Nagaland sorkari Centre nung ruling party den tesentaktep ayutsüsa akümer

**Kohima, June 18, 2024 (TYO):** Nagaland state sorkari Centre nung yimsü asüba party den teti külemi inyaka arur anungji NDPP-i BJP den tesentaktep ayutsüsa akümer ta School Education & SCERT Advisor aser NDPP MLA Kekhrielhoulie Yhome-i ashi.

Kohima kübok Kitsubozou Ward-5 atema NDPP candidate Kekhrielhoulie Khezhie atema nüboyimba sentong ka nung jembidang Yhome-i iba ya ashi.

Taküm Lok Sabha election nung NDPP-i BJP den yaritepba atema takoksa ajuru. Centre sorkari Nagaland state yarir anungji Centre nung BJP mesüra Congress sorkar, koba südir süaka state sorkari parnok den tesentaktep ayutsüsa akümer, ta pai ashi.

Election magidang nungi tesentaktep yua aliba ama NDPP aser BJP den tanga political party tem aser Independent MLA ajaki yaria Lok Sabha nung toktep, saka nübertemi NDPP amadok

aser onok candidate anema vote enoktsü, ta Advisor Yhome-isa ashi.

Khristan state ka ama Naga nung ajaki reshikangshiba anema noktaker aser iba atema Lok Sabha election nung NDPP-i timtem ajurur. Ajsüaka tan ULB election nungbo NDPP-i party kecha den-a tesentaktep mayur aser menden aika nung BJP den tokteper, ta paisa metetdaksü.

"Onoki reshikangshiba aitsür aser tanü nübertem den külemi noktaker anungji nübertemi NDPP nem takok ngudaksütsü mepishir" ta Yhome-isa shisem.

Paisa nübertem dang külemi longjemer Kohima city tobur jungdaksütsü atema NDPP nem vote enoktsütsü aser külemi state sorkar den maparen inyaka aotsü ayongzük.

Nagaland sorkar nung opposition mali saka NDPP kibur lir anungji nübertemi ozü candidate tem takok ngudaksütsü mepishir, ta paisa metetdaksü.

## Mrg aser Chubarongpang tsüingda lenmang shibanger

**Dimapur, June 18, 2024 (TYO):** Mokochung district kübok NH-61(NH-02) nung gari lenmang ulushia yangludang ali aser lung anenzüka aluba agi lenmang shibanga atatsü osang metetdaksüogo.

June 19 nungi 23, 2024 tashi Tuli sub-division kübok NH-61(NH-92) nung Merangkong aser Chubarongpang tsüingda ali aser lung anenzüka aluba okdoktsü atema lenmang shibangtsü ta Additional Deputy

Commissioner Tuli-i metetdaksüogo.

Iba dak sendakba nung NH-61 (NH-02) ajanga senzürtemi tsüinglangen agüja aliba lenmangtem ajanga senzütsü metetdaksüogo.

1. *Tsusangra Bridge (Tuli) Asangma-Kelingmen-Chuchuyimlang Junction-Unger-Akhoya-Changtongya.*

2. *Tsusangra Bridge (Tuli) - Asangma-Kelingmen-Longjang-Sungratsü.*

## Kinungtsü asüba sülen Assam Home Secretary soset

**Guwahati, June 18, 2024 (Agencies):** Assam nung Home Secretary Siladitya Chetia kinungtsü Guwahati mozü ki ka nung asüba sülen pa sasa sosetogo.

Indian Police Service (IPS) nungi 2009-batch officer Siladitya-i pa kinungtsü asüba ICU nung pa service gun agi pa sasa khaset.

Pa kinungtsü ya carcinoma fourth stage nung liasü aser tesüba anogo ishika nija mozü ki ka nung anepalua aru. Pa kinungtsü temang majungba agi tesüba ita pezü tashi leave nung liasü.

"Pa kinungtsü cancer atema anepalua aru aser la temang tamajungba küma ao. Iba osang pa nem sangoktsü aser tanü nikongdang pa kinungtsü asü" ta Nemcare Hospital Director Hitesh Baruah-i ashi.

"Pa mozü ki tonga aru aser doctor o nurse dang la kinungtsü mang den la kija khen yutsütsü ashi. Pai sarasadem sünür ta ashi, saka ajungbena dang injang khatokba ola angashiba agi doctor o nurse tem tonga aodang pa sasa khaseter liasü. Onoki pa kümzüktsü merang saka mekoktet" ta Baruah-isa ashi.

Asür Siladitya Chetia-i Tinsukia aser Sonitpur district tem nung Superintendent of Police (SP) inyakogo. Paisa Assam Police 4th Battalion nung Commandant inyak aser iba sülen Home Secretary ama mapa lemzükja liasü.

"Tanü nikongdang Shiladitya Chetia IPS 2009 RR, Secretary Home & Political Government of Assam-i pa sasa khaset" ta Director General of Assam Police, GP Singh-ia osang metetdaksü.

## Congress candidate mesüzükba atema SEC dangi ken o abener NPCC-i state BJP aser MLA H Tovihoto Ayemi aitsür

**Dimapur, June 18, 2024 (TYO):** Dimapur Municipal Council election nung Congress candidate ka tenüng meyipa agidaksüba atema Nagaland Pradesh Congress Committee (NPCC)-i State BJP unit aser Advisor H Tovihoto Ayemi aitsüogo.

NPCC-isa State Election Commission (SEC) tsüingdang BJP MLA aser Advisor H Tovihoto Ayemi anema shidi ka zülüogo. ULB election atema Model Code of Conduct aser tanga election telatet kübok

Tovihoto-i aibelenogo ta parnoki shidi nung shia lir.

Dimapur nung Ward no 7 Congress candidate Kanili Kinilimi dang Tovihoto-i tenüng meyipa agitsü aser iba melena la Nominated Members ka ama shimoktsü nanzük ta June 17, 2024 nü audio-visual clip ka nung Kanili nanzükogo, ta NPCC-i ashi.

MLA Tovihoto-i iba mapa inyakba ya election menentsüba dang masü saka penal & electoral laws aika alema inyakba lir. Nationally Recognised Party ka

nungi asemben tashi Nagaland Legislative Assembly nung MLA inyaker kati iba ama mapa inyakba atema aoksar aser pai election tiptema agitsüba maparen nung tetsükdaksü bentsür aruogo ta NPCC-i SEC dang ashi.

NPCC-isa SEC dang tekaratiba nung iba tatalokba bushisüngdangtsü aser ozüngi melaba ama aibelener jaoka asüngdangya asütsü mepishio. Iba amaji inyak nung dang alima nung democracy linük tulutiba ung election agiyim merükettsü ta parnokisa ayongzükogo.

## Aluyimer 100-i PM-Kisan indang Instalment agizükogo

**Kohima, June 18, 2024 (TYO):** Dimapur, Chumoükedima aser Niuland nungi aluyimer 100-i Mongulbarnü direct benefit transfer ajanga PM-Kisan Nidhi indang 17th Instalment agizükogo.

June 18, 2024 nü Prime Minister Narendra Modi-i Pradhan Mantri Kisan Samman Nidhi kübok aluyimer 9.26 crore shi ka nem Rs 20,000 crores

jungnüa 17th instalment agüja liasü.

Iba dak sendakba sentong ka Krishi Vigyan Kendra, Dimapur campus nunga ayongzuka agi.

"Nagaland sorkari Rs 1.9 lakh tema agütsütsü renema lir saka accounts kar mejangjatetba Rs 1.5 lakh dang agütsür" ta Department of Agriculture Joint Director Medovilie Ladu-i ashi.

Ladu-isa aluyimertem dang

kulikakettem jangshitsü aser iba teyari agizüktsü atema ayongzük.

Iba sentong nung ICAR - National Research Centre on Mithun Director, Dr. Girish Patel-ia production & productivity nung temlung agütsütsü ayongzük.

Paisa aluyimertem dang ICAR scientists den tongteprateptsü aser sen talila aazüktsü lenmang bushitsü ayongzük.

## Nagaland nungi nisung 45 Punjab tepuokdak lir

**Dimapur, June 18, 2024 (Agencies):** Punjab kübok tepuokdak balala nung Nagaland nungi nisung 45 tashi puoka lir ta Chandigarh nung Helping Hands volunteer Neeraj Punj-i tanü ashi.

Punjab Police-i May 14 aser 15, 2024 anogotem Patiala nung taila call centres 2 makdokdang parnok apu aser non-bailable charges nung yua lir.

Helping Hands ya IPS officer Robin Hibu-i tentetba non-profit organisation ka lir aser iba telok yagi nüngdakbapurtem aser talisa

North East nung yaria arur.

Tsürabur aikati parnok tanurtem tepuokdak aliba memetet liasü ta Mongulbarnü Wokha nung sentong ka nung jembidang Neeraj Punj-i ashi.

Parnok tanurtem ita ka tema tatsük nung tepuokdak aliba osang mangazük liasü aser tsürabur karibo iba ken o ya kanga tulu lir ta memetet liasü, ta Punj-isa ashi.

Ano, tsürabur kari parnok ket nung senotsü maliba mesüra Chandigarh ya meta kanga talangka pilar ta bilemba mesüra

lokta nung menendoktsü ta tarendakba aser tetsüba balala liasü ta paisa metetdaksü.

Iba sentong nung Lok Sabha MP S Supongmeren Jamir aser Neeraj Punj-i pa dang iba onük state sorkar dangi abentsü aser Punjab tepuokdak balala nungi Naga lanur 45 chiochtsü asoshi mapa inyaktsü ayongzük.

Helping Hands volunteer Punj-isa Nagaland nung alirtem dang tangaleni mapa inyaktsü maodang recruiting companies jangjatsü osang prokshitsü ayongzük.

## KMC nung NDPP candidate 5 den tetokteper mali takok nguogo



June 18, 2024 nü KMC Office nung NDPP candidate Kelhousenuo Khruomo-i Certificate of Election agizükba angur.

**Dimapur, June 18, 2024 (TYO):** June 18, 2024 nü Kohima Municipal Council nung

candidate pezü nem Certificates of Election agütsüogo.

Tanü KMC office nung

Returning Officer T. Lanusenla Longkumer, NCS-i ULBs election nung takoker nem kulikakettem agütsü.

Iba sentong nung Secretary to the Government of Nagaland aser Kohima Municipal Council atema Election Observer Anthony Ngullie, NCS aden.

KMC kübok pei pei ward nung tetokteper shinga mali takok angur punguprong ya NDPP nungi dang lir.

Parnok ya Ward No. 1 - Highschool nungi Kelhousenuo Khruomo, Ward No. 2 - Bayavu nungi Avilie Rio, Ward No. 8 - New Market nungi Thejavizo Philip Solo, Ward No. 11 - PWD nungi Neibodzelie Solo aser Ward No. 15 - A.G nungi Ketousie Khamo nung lir.

Dimapur nung ULB Elections atema ketdangsürtem senden amen



ULB Elections atema Dimapur district kübok District level Coordination Committee senden ka June 18, 2024 nü agidang DC Dimapur, Dr. Tinojongshi Chang-i telok den jembiba noksa nung angur.

**Dimapur, Aami/June 18 (TYO):** Municipal/ Town Council Election 2024 tesunep nung agitetsü atema Dimapur district kübok District level Coordination Committee senden ka June 18, 2024 nü Deputy Commissioner, Dimapur indang Conference Hall nung mena liasü.

Iba senden ya Committee indang convenor aser Deputy Commissioner, Dimapur, Dr. Tinojongshi Chang, NCS lenisüba kübok mena liasü.

Iba senden ya State Election Commission totuyuba nung ayongzük, ta pai ashi aser Gaonburas (GBs), colony chairmen aser political party balala nungi teshimtet nisungtem arua adenba atema pelaba lemsatepa liasü.

Chang-i GBs/Chairmen tem dang pei office wazüka yua political party ka atema balaka meinyaktsü aser shisa kaa inyaktsü ayongzük.

Nübuyimba mapang sülen shidak anidaktsü tongtipang lir, aser law and order tsütsü teyari nungdakra GBs temi administration nem osang agütsüsüla, ta pai ashi.

Nüburtem nem timtem magütsüsü mechi pai political party tem dang nübuyima jajaba mapang yimya tajung amshitsü

ayongzüka liasü. Elections takok ngua yimjung nung agitetsü atema political party ajunga tsungta amalitep nungdaker ta pai ashi.

Kevithuto Sophe, IPS, Commissioner of Police, Dimapur ajanga GBs/Charimen aser political party tem dang election sunepa agitetsü mechi administration aser police tem den lungjemer inyaktsü ayongzüka liasü.

Pai candidate aser political party tem dang election agitsü asoshi osang sangdongba anogo nungi election maparen matem tashi inyaktsü aser meinyaktsü yimya/mapa indang rasaa ashi.

W.Manpai Phom, Returning Officer, Dimapur Municipal Council ajanga iba senden nung jembidang, municipal elections ya küm 20 dak tema lir agir aser Dimapur nung tensa balala lir, anungji candidate aser political party temi tim masüba yimya mamshitsüla, ta ashi.

Pai GBs aser colony chairmen tem dang election mapang mulungsentsü temürek nung inyaktsü aser pei office metsüngra-reta amshitsü ajungshia liasü.

Manpai Phom-i GBs aser chairmen tem dang political party ajak nem maangka kasa agütsüsü ayongzük aser nenok

ya sorkar indang tenük aser tenarong ama alitsüla aser administration den teka amteper inyaktsüla aser koda masü timtem ajuruba mapang ketdangsür nem osang agütsüsüla, ta ashi.

Senden nung Mhalo Humtsoe, ADC & Returning Officer, East Dimapur Town Council ajanga political party tem dang election mapang single use plastic mamshitsü aser iba melena sü agi yangluba banners aser kaket agi yangluba posters amshitsü aser sorkar meyong ki o jen nung yamalaji mamshitsü ayongzüka liasü.

Humtsoe-i GBs aser colony chairmen tem dang pei aliba tesem nung yimjung lidaktsüsü asoshi meranga inyaktsü ajungshia liasü.

Anogo ishika tsungta voting anogo, mapang, polling stations amala aliba Voters Information Slip tem colony ajaki yoktsü ta lai metetdaksü.

Iba senden nung Commissioner of Police, Dimapur, Administrator, DMC, Additional Deputy Commissioner, HQ nungi züngsemtem, Dimapur District kübok Political Party shia nungi nisung ka-ka, Dimapur Municipal Council aser East Dimapur Town Council nungi GB/Chariman ka-ka dena liasü.



Dimapur, Aami/June 18 (TYO): Noklak jila nung June 18, 2024 nü International Widow's Day 2024 munga liasü, kong tesemdanger tongti ka ama Principal, IETC & Director SAMETI, Dr. Watila Jamir aser tetushi tesemdanger ka ama EAC Noklak, Kathyinla Jamir dena liasü. Iba sentong ya Hope Channel ajanga NStCB aser Noklak Town Baptist Church lungjemer ayongzüka liasü.

**NAGALAND POLLUTION CONTROL BOARD**  
Signal Point, Dimapur - 797112, Nagaland  
Tel.: 03862-245727, TeleFax: 03862-245728  
Website: www.npcb.nagaland.gov.in e-mail: npcb2@yahoo.com

**AMBIENT AIR QUALITY FOR KOHIMA AND DIMAPUR CITY**  
**KOHIMA ASER DIMAPUR NUNG MOPUNG MERÜK-MEMERÜKBA JENJANG**

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaktsüsüla"
				11.06.2024	13.06.2024	15.06.2024	
1	Dimapur	Bank Colony	Residential	84	96	104	100 µg/m <sup>3</sup>
2		Dhobinala	Commercial	131	139	114	
3		NPCB Office, Signal Colony	Residential	94	78	91	
4		Tenyiphe, Chumoukedima	Commercial	62	83	78	
5		Nagarjan	Residential	87	113	100	
6		Viola colony	Residential	57	68	76	
7		Burma camp	Commercial	126	118	117	
8	Kohima	Opposite NST Office	Residential	76	34	41	
9		PWD Junction	Commercial	84	40	67	
10		High School Junction	Commercial	153	65	95	
11		Midland (Upper)	Residential	85	34	56	
12		Forest Colony	Residential	87	42	51	

Iba osang ya nüboritem ajangzüktsü atema Nagaland Pollution Control Board-i agütsür.

DC Dimapur-i ULB election atema tetuyuba agütsür

**Dimapur, Aami/June 18 (TYO):** ULB Election 2024 maparen metembang tashi candidate aser political party temi inyaktsü aser meinyaktsü mapatem indang Deputy Commissioner & District Election Officer, Dimapur ajanga metetdaksüogo, aser item nung aibelenbaji Model Code of Conduct nung aibelenba den sako asütsü ta ashi.

**INYAKTSÜTEM:**

1. Senden amenba mapang traffic azüoktsü aser temzüng ozüng shidak amshia lendong timtem madokdaksütsü mechi mapang jelia lia pei aliba tesem nung police ketdangsür nem senden amentsü tesem aser mapang indang osang tejangja jelia metetdaksütsüla.
2. Senden amentsü aliba tesem nung tenokdangba kar danga lira, itemji kanga akumtsüboa amshitsü.
3. Senden nung loud-speakers mesüra iba amala osettsüset amshinera temelaba agitsüla.
4. Yimtung süa jaja tenzüktsü mapang aser tesem, jajatsü lenmang, mapang aser tesem indang jelia lemteta police ketdangsür nungi jelia temelaba agitsüla.
5. Yimtung süa jajatsü aliba lenmang/tesem kar nung tenokdangba kar danga lira itemji kanga jangja meteter item tenokdangba sülen anidaktsüla. Aser traffic ozüng aser danga tenokdangba ajak alitsü.
6. Party workers temi badges mesüra identity cards amshitsüla.
7. Election agiba anogo gari senzüba nung tenokdangba agütsüba ama inyaktsüla.
8. State Election Commission nungi tejangja temelaba agüja aliba nisungtem dang polling booth telungi mashi mapang aittetsü.
8. Only persons with a specific valid authority letter from the State Election Commission can enter any polling booth at any time. No functionary however highly placed is exempt

**MEINYAKTSÜ:**

1. Election maparen atema official gari mesüra nisung mesüra machinery tem mamshitsüla. Central Government, State Government aser public

funds tera dang süaka inoka aliba aser central aser state sorkar kübok central police organizations indang gari tem mamshitsü.

2. Power nung aliba party/ Government ajanga takok anguba indang advertisement public exchequer nungi sen amshia magütsüsüla.
3. Voters nem senotsü magütsüsüla aser memesüzüktsüla.
4. Nüburtem indang kin-kidong nung kongshia vote agütsüsü meinyaktsüla.
5. Temples, Mosque, Churches, Gurudwaras mesüra tekülem agiba tesemtem amshia election propaganda mejembitsüla, party malutsüla, ken matemsüla.
6. Sübokrem, tim masüba yimya amshia anir aruba, vote agütsüsü asoshi mesushiba, personating, Polling Station temeket metres 100 tsungta canvassing aoba, polling tembangtsü ghonda 48 lia lokti senden amenba aser voters senzüsempontgsü atema senotsü agütsüba amala ochimashi yimya mesüra electoral offence mamshitsüla.
7. Nisung ka tangatetba mesüra inakyim anema pa/ la ki anasa longkak aitba yimyatem mamshitsüla.
8. Nisan, banners, pasting notice mesüra yimyim zülutsü atema kibur nungi temelaba magi shinga indang ali, ki, compound wall amala mamshitsüla.
9. Danga political party mesüra candidate temi ayongzükba lokti senden mesüra yimtung süa jajaba nung timtem magütsüsüla.
10. Danga party ka senden mena aliba ajanga yimtung süa jajaba malitsüla.
11. Missiles aser nok-nü ama amshitsü akokba osettsüset kecha yimtung süa jajaba mapang mamshitsüla.
12. Danga party aser candidate temi adokba aser amshiba poster tem meindoktsüla mesüra meraksatsüla.
13. Ketdangsür nungi jelia temelaba magie anepdang 6:00 ako matongdang mesüra aonung 10:00 ako sülen gari nung mesüra kidang loudspeaker mamshitsüla.
14. Youth camp/political party indang camp lapoktsü memelar.



Noklak nung anentsüh aluba ajanga ki o jen raksatsür alirtem nem Deputy Commissioner & Chairman, DDMA, Arikumba ajanga June 18, 2024 nü teyari agütsüba mapang tangokba noksa ka yangi angur.



June 18 nü Uttar Pradesh kübok Varanasi nung Krishi Sakhis nem PM grants certificate agütsüba noksa nung angur.

## 'Mann Ki Baat' sentong June 30 nü tenzüktsü

**New Delhi, Aami/June 18 (Agencies):** Ato Kilonser Narendra Modi-i Mongolbarnü sangdong ka ajanga, pa indang monthly radio broadcast, 'Mann Ki Baat' sentong June 30 nü nungi tenzüktsü renema lir, ta metetdaksüogo.

PM-i X ajanga, "election aliba ajanga ita ishika anena ataba sülen #MannKiBaat sentong tenzükshitsü pelashishia sangdonger! Iba ita sentong Deobarnü, June 30 nü agütsü," ta ashi.

Episode tem atema nübürtem dang parnok tebilemba lemsateptsü mepeshiba den pai nübürtemi lemsateptsü asoshi onük kar shidanga liasü. PM-i ashiba agi,

parnoki MyGov Open Forum aser NaMO app ajanga nübürtem tebilemba agizüktsü. Ano nübürtemi parnok indang osangtem record sür iba number; 1800 11 7800 ajanga yoktettsü.

'Mann Ki Baat' sentong koba ita nung khen agir, iba ya 2024 General elections agütsü aliba ajanga ita ishika magi-i ata aser tatemsa February 25 nü agia liasü.

Iba sentong episode 110buba nung Modi-i, taküm mezüngbuba vote agütsütsüpurtem dang vote agütsütsü ajungshia liasü. Otsütsütsüsa vote agütsütsü ayongzüka Modi-i tang mezüng vote agütsürtem dang linük

asoshi vote asütsü ayongzüük.

Election Commission indang Model Code of Conduct (MCC) guidelines ajanga sorkari official sentongtem mesüra public-funded sabangtem amshitsü memelar, kechiyong iba ajanga parnok nem maongka tali agütsür. Ibayongji PM indang 'Mann Ki Baat' sentong ya khen atema anena ata.

"Mann Ki Baat ya nübürtem asoshi aser nübürtem indang sentong ka süaka yimden yimsüsüba tsütsü inyakyim sülen anidaka 'Mann Ki Baat' sentong taruba ita asem magütsü, kechiyong Lok Sabha election agütsü lir," ta PM-i tatembangbuba episode nung ashi.

## WB nung BJP temi central team anema longkak ait

**New Delhi, Aami/June 18 (Agencies):** West Bengal nung election tembangba sülen mepetmesü balala adokba dak sendakba bushisüngdangtsü atema züngsem pezü agi kümteba BJP central team ka Bengali-i aru, saka par party kübok inyakertemi parnok magizük. Party kübok inyakertemi ashiba agi, parnok pei ki kangshia toktsür atotsüsa akümba mapang party nungi lenir tejentemi kecha haut a maliasü.

Election tembangba sülen BJP kübok inyakertem anema jenjang agiba bushisüngdangtsü atema Iba team yagi Hombarnü Coochbehar semdanga liasü. Parnok ya South 24 Parganas kübok Amtala tesem nung longkak aita aliba party kübok inyakertemi sota liasü, ta BJP party source kati ashi. Party kübok inyakertemi election

tembangba sülen parnok pei kidang nungi jena aotsüsa akümba indang lenir tejentem nem metetdakja liasü.

Team nung convener Biplab Deb, senior BJP leader Ravi Shankar Prasad, aser Rajya Sabha MPs Brij Lal aser Kavita Patidar nung densema liasü.

Biplab Deb-i osangbenertem dang ashiba agi, election sülen mepetmesü adokdaksüba ya Trinamool Congress yimya ka kümogo. "TMC-i opposition party tem amakba yimya koda takaraba nungi melenshidir yamaji parnok atema tajangzüük asütsü," ta Deb-i ashi.

Trinamool Congress leader Shantanu Sen-i ashiba agi, BJP kübok inyakertemi par lenirtem anema longkak aitba ajanga party yongtsü nung mepetmesü adokba sayur. Paisa, election tembangba sülen mepetmesü

adokdaksüba atema BJP puri TMC aitsüba ya shitak masü, ta ashi.

Taoba mapang BJP party tir Suvendu Adhikari-i anir election tembangba sülen mepetmesü nung akoksartem West Bengal Angh ajurutsü atema Raj Bhavan-i aoba nokdanga liasü, kechiyong iba mapang iba tesem nung Section 144 benoker liasü.

BJP national tir JP Nadda-i iba team ya tentetja liasü. Asansol, Howrah, Bhangar, Ghatal, Konnanar, Basirhat, Jhargram aser Kolkata nung mepetmesü adokba indang tashishiba agütsüogo.

Lok Sabha elections sülen BJP kübok inyakertem dokan aser parnok ki amakba indang osang temai adok aser item tatalokbatem atema TMC dak tai tonglokja liasü.

## NEET-UG tatidang ken o nung Rahul-i PM Modi aitsü

**New Delhi, Aami/June 18 (Agencies):** NEET-UG 2024 tatidang dak sendakba nung inyakyim meshidakba aliba ashishiba dak sendakba nung ola matokba atema Congress MP Rahul Gandhi-i Mongolbarnü Ato Kilonser Narendra Modi aitsüogo.

Supreme Court-i, NEET-UG 2024 tatidang ayongzüka agiba mapang kari danga 0.001 per cent danga aibelena lira kanga junga bushisüngdangtsüla ta Centre and National Testing Agency (NTA) dang ashiba sülen mapang tatsüka dang lir Rahul Gandhi-i PM aija liasü.

"Teti ama Ato Kilonser Narendra Modi-i, NEET tatidang mepetmesü ajanga kaketshir lakh 24 dak tema indang tarutsü raksatsüba dak sendakba nung ola madoki alir. Bihar, Gujarat, aser Haryana nung nisung apuba ajanga tatidang inyakyim nung ochi mashi inyakyim sendaka aliba jangja jangja sayur, aser item BJP-i yimsüsüba state tem ya paper leak asüba teyongtsü kümogo," ta Rahul Gandhi-i X nung post sütsü.

"Onok indang manifesto nung paper leaks asüba dak sendakba nung oziung tesashiba benoka lanurtem tarutsü kümzüka toktsütsü nangzüükogo.

Opposition ama onoki nangzüükba atalokja linük ajunga nung lanurtem ola yimtung nungi Parliament tonga bener aotsü aser inyakyim tesashi benoktsü atema sorkar nongshitsü," ta Congress lenir yagi shisem.

NTA-i achaayanga agiba NEET-UG tatidang ya, MBBS, BDS aser AYUSH aser tanga course tem atema sorkar aser jurila institution tem nung admission agütsü atema lir.

Maneni Rahul Gandhi-i kaketshirtem dang Parliament nung pa parnok indang ola akümtsü aser parnok tarutsü dak sendakba nung ken o tem ajang ajanga benoktsü ta tenangzüükba agütsü.

Tatidang atema kaketshirtemi kanga meranga inyakogo ta shia Supreme Court-i Mongolbarnü National Eligibility-cum-Entrance Test (Undergraduate)-2024 tatidang dak sendakba nung litigation ya adversarial ama magütsüla ta shiogo.

"Nisung kari danga 0.001 per cent danga aibelena lira kanga junga bushisüngdangtsüla," ta Justices Vikram Nath aser SVN Bhatti nati kümteba vacation bench kati Centre aser NTA na tenung nung nokdakba okatsür dang ashi.

## Himachal CM kinungtsü bypoll nung Dehra nungi tokteptsü

**Shimla, Aami/June 18 (Agencies):** Himachal Pradesh chief minister Sukhvinder Singh Sukhu kinungtsü Kamlesh Thakur taruba assembly bypoll nung Dehra constituency nungi tokteptsü.

Party tekolakba Mallikarjun Kharge-i agizükba sülen Congress general secretary K C Venugopal-i iba list ya Mongolbarnü saya liasü. Party-i ken o asadanga aser local lenirtem tebilemba angadanga sülen Kamlesh Thakur shimogo. La ya Dehra assembly constituency nungi lir. La Independent MLA Hoshiyar Singh shiba BJP nung denogo pa den tokteptsü.

2010 küm delimitation sülen Dehra constituency ya kümteba liasü. Tang tashi nung Congress-i iba menden khen danga koka mali. 2012 küm BJP nungi Ravinder Singh Ravi shim aser iba sülen Independent candidate Hoshiyar Singh 2017 aser 2022 küm shima liasü.

Hombarnü Congress-i, Hamirpur nungi Pushpinder Verma aser Indian National Trade Union Congress (INTUC) Himachal unit tir mapa ponguben tashi bener alisang Hardeep Singh Baba, Nalagarh nungi tokteptsü shimba sangdonga liasü.

Verma aser Baba na Krishan

Lal Thakur aser Ashish Sharma na den tokteptsü, shirnoki tena 2022 assembly election independents candidate ama tena koka liasü.

Independent legislators asem, shirnoki BJP nominee Harsh Mahajan pusema vote agütsü liasü, parnok asema mapa toktsüba sülen assembly menden asem atema election agishitsüsa aküm.

Independent MLA asem yagi parnok indang resignation shiti March 22 nü agütsü. Himachal Pradesh Assembly Speaker Kuldeep Singh Pathani-i parnok indang resignation shiti ya Lok Sabha elections aser assembly menden trok atema by elections tembangba sülen June 3 nü agizüka liasü.

BJP-i parnok den adenba MLA, Ashish Sharma, Hoshiyar Singh aser K L Thakur nung nung Hamirpur, Dehra aser Nalagarh nungi tokteptsü atema shimogo.

KL Thakur ya Nalagarh nungi anaben tashi adokogo. Pai 2012 küm BJP ticket nungi election akok aser iba sülen 2022 küm Independent ama takok angu.

Hoshiyar Singh ya-a Dehra nungi anaben tashi adokogo. Pai Independent candidate ama 2017 aser 2022 küm election kokogo. Sharma ya tang mezüngbuba Hamirpur nungi MLA lir.



New Delhi nung June 18 nü Chief of Staff Committee senden amenba mapang Chief of Defence Staff Gen Anil Chauhan-i Joint Doctrine for Cyberspace Operation sayaba noksa nung angur.



# TIR YIMYIM

## YIMOBILEM (EDITORIAL)

DIMAPUR RASEMNÜ, JUNE (AAMI) 19, 2024

### Kanga menuogo, Amit Shah !

**M**anipur lenden len yaküm May ita nungi tenzüka Manipur nung lisopur telok Meitei nunger o Kuki nunger na tsüngda azü tokshi lendong tulu adoka tenla ki dena kiojen aika rongdoktsüba mapang linuk nung kilo kilonser Amit Shah Manipur tashi tonga orr Yimjung luden ka shima toktsü saka mapa meinyakteti akümba sülen, tang Meitei aser Kuki nunger na putepa alitsü asoshi yimjung o jembitsü metetdaksüba kanga menur inyak tenzüksüba mapa ka asütsü, Atangji, meputepi alidak yimjung mapa inyaksüba kanga temenu maka saka tang amaji Kuki nunger o Meitei nunger na tesem kanga nung külemibo kodanga melitetsüsa kati ka tepsettepba mapang kilo kilonser dang masu saka ato kilonser (prime minister) dena aruagi yimjung mapa maneni inyak asünungbo tang dang nungibo tensa mapang tajungba kümer lila ta bilemer. Manipur lima nung ya lendenlen Manipur nunger lisopur, shirnok dang Meitei nunger ta ajar, parnok alir. Anungji, Manipur lenden limaji Meitei nunger meyong aser Manipur limasa süaka tenemlen kin ana, Naga nunger o Kuki nunger na alir. Aji oda, Manipur state ya kin asem Meitei, Naga aser Kuki nungertemi küma lir. Ajisüaka, ajak atema tia majung kaji, kin asem rongnung kin anata putepa mali. Aji oda, ali tsütsü Naga nunger o Kuki nunger na küm 30 jakdang sashia raraogo aser tang tashi mesüngjemteti lir. Kasaji, Naga nunger o Meitei nunger na ta meputepteter kechiyong Meitei nungertemi Naga nunger ajak yimten ka kübok alitsü asoshi tang aliba Manipur state nungi razüka aotsü nokdang aser tang adokba lendong ya Meitei nunger o Kuki nunger na tsüngda ataloker. Meitei nunger o Kuki nunger na külemi kibalemputepa putepa liasüba ajungbenaka yamai tsükchir akümtsüsa atalokba ya, Myanmar nungi Kuki nungertem nungpoka adoka Manipur government li atsünga agir aser khen nung nÜtsünga aika renlokogo ta Meitei nungertemi shisabolua kuli agütsüba asenoki angashiogo. Atangji, iba jagi Meitei nungertem shisaboludaktsür asütsüsa akok, kechiyong kasaji Manipur nung alir Naga nungertemia ashir. Ajisüaka, yaküm May ita nungi atalokba lendong yabo All Tribal Students' Union, Manipur (ATSUM) purtemi anir Meitei nungertem nem Scheduled Tribe jenjang magütstsüla ta lokti senden ayongzüka longkak aitba anogo nung atalokba mapa ka lir. ATSUM nung yabo Naga nunger o Kuki nunger na prongla dena lir, anungji kanga tia majung kaji Naga nunger o Kuki nunger na külem kaketshir telongjemi ayongzüka sentong mapang kasa lendong ya atalok. Ajisüaka, Meitei nungertemi Naga nungertem dakbo mekongshi, anungji iba rara ya Kuki o Meitei na rara kümadok. Atangji, Nagaland nungia Naga nunger arogo aser lokti lenirtemi Imphal tashi jagi Meitei nunger o Kuki nunger na tsüngda yimjung yanglutsütsü merangogo saka makok, kechiyong Manipur nung kin o kin na meputepba onÜk ya ka dang masü aika, anungji ka bentetyonga ano ka mebentetsü. Aji oda, tangatet tasak kaji, Manipur nung alir kin asemprongla nung pei pei yimten temeten alangzüksü atema telongpur teloktem lir. Ajia kin shia telongpur telok kaka dang masü saka aika lir. Iba jagi Manipur nung alir kin asem ya temulugjang ajak agi putepa alitsüba kanga tasak tensa tia ka nung parnok alir. Iba ama tebenja yimten tensa tia alidak, metetsümonga repranga lia kin ana raratepdaktsüba nungji center aser state government-a kechi ajangzüker ta bilemer. Joko, Manipur Civil Secretariat aser Directorates nung Meitei aser Kuki nunger na külemi inyaksüba kati tetsübuttsü aser tarendaksüka kümogo, anungji tamakoktsü asütsü. Iba ama tensa tia ka nung Amit Shah ama katibo Kuki o Meitei na tangsa tang putepshitsüsa meinyaktetsü. Ibaibo parnoki mamanger dang ashi, Yisu tashi aser taochi nung inyaksüba dang.

# OLEMSABANG



OFFICE OF THE  
**LANGPANGKONG KAKETSHIR MUNGDANG**

*Langpangkong Students' Conference*

H.Q. Chuchuyimlang – 798614. Dist. Mokokchung : Nagaland

Email : [Langpangkongkaketshirmungdang@gmail.com](mailto:Langpangkongkaketshirmungdang@gmail.com)

Ref. No. LKM/GS/ULB-05/2024

Date : 16/06/2024



14th aser 15th June, 2024 anogo Changtongya aser Tuli nung Langpangkong Kaketshir Mungdang (LKM) ajanga ayunga (Organize) Changtongya nung Ao Kaketshir Telongjem Changtongya Town aser Tuli nung Kaketshir Telongjem Sub-unit Merangkong, Wameken aser Kangtsüng longjemer aruya aliba ULB Election nung tokteper Candidate-tem ajak ayungtena, "COMMON PLATFORM" sentong tajung agizüka (Host) liasü. Talisa "LKM CLEAN ELECTION" nükmen meraksai election merükteta, ochiba nung nokdaksü asoshi ajungshia, Lenir tajung ka ama shilem tajung agitsü Sentong tajung ayunga munga liasü.

Changtongya Town Council Election nung shilem agitsüpar ajak aki 22 liasü. Parnok tenüng, Ward aser Party yamai : T. Rongsennungla Ao, Medical Ward (IND), Mongtiba, Church Ward (IND), T. Meyi Ao, Windy Ward (IND), Toshimongla, Sunrise Ward (IND), P. Toshi, Longchara Ward (IND), Chubawati, Church Ward (NDPP), Tiamongla, Electrical Ward (IND), A. Chubanokdang, Antsutzubo Ward (NDPP), Tongpangmeren, Windy Ward (NDPP), Pursangla, Sunrise Ward (NDPP), Talimoa, Longchara Ward (NDPP), Temjennungsang, PWD Ward (NDPP), Sentsiangla, Electrical Ward (NDPP), S. Chuba Lkr, Tzumokkong Ward (IND), A. Limasanen, PWD Ward (IND), Chubakumla, Medical Ward (NDPP), Marwati, Longchara Ward (INC), Imlimeren, Tzumokkong Ward (IND), Sademmongla, Medical Ward (IND), Temsuyanger, Longchara Ward (IND), Talisangla, New Medical Ward (IND), Imkummeren, Longpangtsung Ward (NDPP).

Tuli Town Council Election asoshi parnok ajak aki 12 liasü. Parnok tenüng, Ward aser Party yamai : Aomeren, Shitikolak Ward (IND), I. Onen LKR, Tuliyoung Ward (INC), Akumlemla, Tulikong Ward (IND), Imobendang, Longkongmendang Ward (INC), Temsumenba, Mendenti Ward (INC), Temsuinla, Tulikong Ward (BJP), K. Imlitemjen Jamir, Longpong Ward (INC), Moatemjen, Longkongmendang Ward (BJP), Shilutila, Aitlenden Ward (BJP), Purtoshi, Shitikolak Ward (IND), Alemchuba, Longli Ward (NDPP), Chubarenla, Patizung Ward (NDPP).

Iba sentong 14th June anogo nung Longma Watsü Süngki Hall, Changtongya Town nung among, iba mapang, Sp. Tiaakum, Tatong Tir Ao Kaketshir Telongjem, Changtongya Town ajanga sentong lenia liasü, Rev. T. Aliba Imchen, Asso. Pastor Changtongya Town Baptist Arogo ajanga sarasadema sentong tenzü. Sp. Imlinok, Tir LKM ajanga pela-a agizükba O lemsatet, iba sülen Candidature O (Speech) 3mins. each agüja liasü. Wb. Linükyanger Pastor Mongsenyimti Baptist Arogo ajanga Temerük Election ranglok O jempia liasü. Pai ashiba

aki iba ULB Election ajanga kiyonger o kiyonger na tejak ashiteptsü anasa lir. Pai sa candidate-tem dang kümdanga alitsü asoshi Asen Aoer-tem Tsürapur-i junga lia arura iba tenüng naroküm chirnur nem nungtem tajung jaloktsüba meraksa-i, nüburtem-i iba naroküm tajung melena tenüng tamajung jaloktsütsü sa malitsüla aser nangzüka ama ochishia inyaksüla ta shia liasü. Tatem nung telok ajak longjema sarasadem aser Pastor ajanga Amen ashi.

Maneni, 15th June 2024 anogo, FRMCA Hall Tuli nung amungba mapang shilem agirtem : Wt. Arenbenla Jamir, APY Aitlenden Baptist Arogo ajanga sentong lenia liasü, Rev. C. Tongpang Pastor TLBA ajanga sarasadema sentong tenzü. Sp. Imlinok, Tir LKM ajanga pela-a agizükba O lemsatet, iba sülen Candidature O (Speech) 3mins. each agüja liasü. Rev. Sentiwapang, Pastor, Unger Baptist Arogo ajanga Temerük Election ranglok O jempia liasü. Pai ashiba aki Tuli lima ya Naga nunger nükrangtong. Tsürapur mapang makamait tia süaka Tuli bilemtetdang anisüngzüka aliba, tanü iba senmang samaoko, iba ji tanü Lenirtem aser Lanurtem-i bushidangsü, merüktetsü asoshi mapang tongoko ta shia liasü. Pai sa ashiba aki tanü Tuli tia ya Laishiba nung zülua aliba ama Isau senmang chi (rice) auso ka yung tampu senmang Yakop-i rakzük ama lir, anungji samar aliba senmang bushitsü, terenlok asoshi mangdang tajung yur iba Election nung ajaki shilem tajung agitsü ajungshia liasü. Tatem nung telok ajak longjema sarasadem aser Pastor ajanga Amen ashi.

Sentong nung candidates tem ajaki parnok nükjidong tajung nübur tenzüksü aser ochi shia inyaksü asoshi tejangraba tulu telok den lemsatet aser "CLEAN ELECTION" nung akang akanga nokdaksü ta nübur dang tenangzüba agi. Maneni, Sp. Imlinok Tir LKM ajanga Clean Election aser Common Platform ayongba nükjidong lemsatet. 3rd Sept. 2016 küm nungi tejaklen lenir aser LKM CECC ajanga tenzüka aser meranga takokma nung inyakba bilemteter aser tenungsang tulu agütsür aser iba maparen takokma nung arur ta Tir ajanga lemsatet. Joko Langpangkongsanger asoshi ya inyaksü meinyaksü ajungshiteptsü mapang süyioyo saka anünga alir asoshi len sayuba mapang asütsüla ta candidatures aser nüburtemden lemsatet. Aruya aliba ULB Election nung lenir aser maparen inyaksangshirtemi majimajentsü, Sen agi nübur aser talisa kaketshir tia meraksatsütsü aser temeden meyongnem tarutsü lenirtemi rakzükraitemtem ama meinyaksüla ajungshi. Tuli aser Changtongya town renloktsüji LKM-i jangrar aser yongrar anungji Tila-tula, ni-ozü ta tangatetba nung masü saka arok, asenok, külemi ta asüba tangatetba nung terenlok aser telongjem asoshi lenir aser nüburi angatetsü ajungshi. Tatemsa Sokar (Government) ajanga aruya aliba ULB Election asoshi latetsüba temzüng nung ajaki anidaksü Yimyim LKM mendenti ajanga ayimoktsü.

**IMLINOK**  
**PRESIDENT LKM**

**MEYITONGPANG**  
**GENERAL SECRETARY LKM**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pakistan nung tamanger ka tepsetba atema pua alir nem bail agütsü

**Lahore, Aami/June 18 (Agencies):** Pakistan nung police temi junga bushisüngdang masüba aser Islam yimsü kanga metsünga-reta amshiba party kati kanga ajungshiba mechi tamangba yimsü mezüngmeshi ta tiazü nung tai tonglokja Khristan ka tepsetba nung aija alir Muslim nung nisung 52 nem taoba hopta bail agütsüo.

May 25 nü Punjab Province kübok Mujahid Colony area, Sargodha nung arishi küm 74 tain Nazeer Masih Gill züksetba atema First Information Report (FIR) nung agüja aliba nisung asem densema iba mapa inyakba nung temulung melemi alirtem nem Special Judge Anti-Terrorism Court Sargodha, Muhammad Abbas ajanga June 13 nü bail agütsü. Gill ya June 3 nü Rawalpindi kübok military hospital ka nung yiruba zübu ajanga asü.

Attorney Asad Jamal-i parnok chiokba sasar saka police temi asaa junga bushisüngdang masüba yong parnok chioktsü imlaa liasü ta ashi.

"Tetenzük nungi police inyakyim nung temulung melemi liasü. Bushisüngdang temi lendong atalokba tesem mesemdang aser temulung melemi pua alirtema asüngdangya asütsü memerang. Temulung melemi alirtem pua iba anogosa jail-i yok, saka shidakba nungbo police temi parnok puer asüngdangya asütsüla," ta Jamal-i Christian Daily International-Morning Star News dang ashi.

Khristanpur densema tamangba yimsü mezüngmeshi ta tiazü nung tai tonglokja alirtem asoshi ken o jembitsüsang Muslim lawyer ya Human Rights Commission of Pakistan (HRCP) indang fact-finding mission nung dena liasü aser pai Gill züksetba ya kanga junga asameyanger teka sangshiba aser tajangzük angutsü mechi tamangba yimsü tenüng amshi, ta ashi.

Ken o raksatsütsü mechi police temi nisung tai indang kuli tem benden, ta Jamal-i ashi.

"Parnoki iba lendong atalokba ngua alir kidangertem nungi kuli bendentsüla liasü, saka yamaji meinyak. Ajidang masü police temi tanü tashi Gill'er kibong nungi kuli bendena mali," ta pai ashi.

"Gill'er kibong iba ken o nung liaka Police temi parnok den osang kecha melemsateper. Bail ya sangdong medeni magütsür. Timtem ajurua aliba kibong kechiba judge-i mejaok? Police-i kechiba parnok dang bail indang jembitsü masü aser parnok tangatetba lemsateptsü

kechiba court-i mejaok?" ta Jamal-i ashi.

Kuli bendena temulung melemi alirtem nem temerenshi agütsütsü sorkar tebilemba majiteter, ta pai ashi.

Gill züksetba nung shilem agia alir ya Islamist party Tehreek-e-Labbaik Pakistan (TLP) nung züngsem lir, aser parnok apuba mechi Sargodha nung TLP teloki longkak ait, saka sorkari mapa kecha meinyak, ta okatsüri ashi.

"TLP lenirtemi yimjak nung police aser Khristanpur amokmeren aser Gill tepsetba atema parnok tenüng asang, saka parnok anema mera kecha magi. Iba ya court tsübodaktsütsü merangba tejangja mapa lir. Sorkar nungi teyari medeni Pakistan nung obendanger temi ken o jembia obendang agütsütsü tamakoktsü."

Sorkar tenüng nung Urban Area Police Station ajanga mejangjaba nisung 300 nungi 400 tsüngta aser tejangja nisung 44 anema FIR benoka lir. Iba ken o ya Anti-Terrorism Act (ATA) 1997 aser Pakistan Penal Code (PPC) kübok section balala nung ajemdaker benoka lir.

Police temi temulung malemba nung ajemdaker parnok iba ken o nung aniok ta temulung melemi alirtemi ashi, ta Judge Abbas-i ashi. Police temi iba tatalokba nung parnok inyakba tejangja kuli magütsü aser tenük kuli anir nisung 18-i parnok kata mejangjatet, ta parnok ashir.

"Ajidang masü onok ket nungi kecha mongutet," ta parnok ashir.

Parnok indang petitions

agizükba mapang obendangeri temulung melemi alirtem ya nisung shia surety bonds sen 100,000 rupees (US\$360) keter bail nung chioktsü totuyuba agütsü.

Parnok chiokba ajanga Khristanpur aser rights advocates tem aoksa aser kanga jashitep.

Parnoki Gill indang ken o ya August 16 nü atalokba Jaranwala cases ama asütsü südi ta amanger, kong temulung melemi pua alir ajak bail nung chiok aser police temi junga bushisüngdang masüba aser obendanger tashi maitba mechi court nung ken o jembiba anendaktsü.

Nazeer Masih Gill'er jabaso Sultan Gill-ia police temi parnok dang statements memeshi aser bail indang osanga magütsü ta shiogo.

"Bail otsü ya onok asoshi taoktsü osang ka lir. Onok aliba tesem nung ajungbena police timba yokba sülen onoki iba indang metet, kechiaser bail nung chioker ya timba ozü kiyong nungi lir," ta Sultan Gill-i ashi.

Police temi onok kimai madokdaksür, anungji onok pei kidang tepuokdak ayur ama kumogo, ta ashi.

"Iba ken o koloni aor onoki memetet. Onok iba yimti yutsür tesem kar bushia aotsüba dak alaka lenmang kecha maka," ta pai ashi.

Arogo lenirtem aser Khristanpur activist temi tamangertem reshikangshi tali akuma anema jembia sorkari ola madokba aser mera magiba ajanga Pakistan nung tamanger aika Islamist extremists taochi nung dang alir.

## ANOGO ABEN TSÜNGREM DEN

### Ne mulungtet takang

*Aser kodang pa temai adoka agizüktsü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.*

Khristan taküm nungi atsüngzüka aotsü temela! Kodang Tsüngremi ne nem kechi inyakdaksüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtetsü. Pa temulungtet tejangja ngur Samaria nungeri Yihuda nung ka parnok yim ajanga Yirusalemi aor bilema parnok pa magizük.

Yisui pa tenyaba nungi matsüngzüktsü mulungtet saka pai leman nung aika tenzüktsü mapang agi pai nütsüng neter temeket townsi yok (Luke 10:1). Pai chitemra akettertem anebtsü (Luke 17:11-19). Temang waka shirangertem anebtsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsüngtem dang sayu (Luke 15:1-32). Yisu Kalvaryi atudang Pai tangar tenzüktsü mesongtem saka Tebui mulungba nungi atsüngzüktsü pai memelung.

Tsüngremi ne nem kechi inyakdaksüner nai metetta lira, ibaji atalokdaksütsü bendanga mulungtetter, ne tejak mulung mulunga iba tsütsü meyipang (A.Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdaksütsü kümdangang. Tatitangbai tashi angatsü menua tekümdaktsü mesüra tesentokdaksü. Nai Tsüngrem nungi tejangja mapa agizük, ne tashi angaba nung mainshi inyaktsüla.

## BJP-i PM-Pope indang post aitsü, Kerala Congress-i tatok meshi



**Thiruvananthapuram, Aami/June 18 (Agencies):** Ato Kilonser Narendra Modi-i Pope Francis ajuruba indang post ka BJP-i aitsüba sülen Kerala unit Congress-i Khristanpur dang tatok meshi.

Ato kilonser-i Pope ajuruba indang noksa ka state Congress unit-i Deobarnü lemsatepba nung "Tatamsa Pope-i Tsüngrem ajurutsü maongka nguogo," ta caption zülüja liasü, koba ato kilonser-i tawa jembiba

den sendakteptsüba lir.

BJP Kerala state unite-i Congress indang post ya Khristanpur asoshi mezüngmeshi lir ta ashi.

"Congress-i tweet asüba ya ajanga Ato Kilonser Modi ya Yisu Khrista den sako kumdaktsür. Ibai khenyongi tim masü aser Khristanpur asoshi mezüngmeshi lir. Iba jenjang tashi Congress aluba ya maksü lir," ta Union Minister aser BJP lenir George Kurian-i ashi.

Congress-i Pope aser National Congress yimsü nung Khristanpur mezüngmeshi mali ta iba linük nung aliba tenzükogo, ta Kerala state BJP tekolak K Surendran-i ashi.

"@INCIndia Kerala 'X' handle ya radical Islamists tangatettep nung nüburtem tejak mezüra Urban Naxals temi leni anir. Alima nung aliba amshir amai lir, aser linük Khristanpuri Tsüngrem ama meimba lenirtem maneni bilema alisang Pope mezüngmeshia o tamajung post asür. Tangbo parnok Pope aser Khristanpur-a atala amshir. Kerala nungi AICC General Secretary @kcvenugopalmp-i iba ya meteta alitsü. Iba ya yariba nung @RahulGandhi aser @kharge nung tejangraba kechi lir?" ta Surendran-i ashi.

Kerala Congress-i Hombar aonung tatok meshi aser tamangba yimsü Taoba ita news channel ka mezüngmeshiba par yimsü nung mali ta ashi.

"Tamangba yimsü, tamangba yimsü nung putirtem aser idols tem mezüngmeshitsü Indian

"Iba post ajanga Khristanpur jashidakja lira, onoki tatok meshir," ta post nung shia liasü. den sensaksema mapang PM Modi-i 'Tsüngremi nükjidong ka yur pa yok ta angateter aser iba nükjidong atalokba sülen kü mapa atemtsü,' ta shia liasü.

### AO OSHI ANGAZÜKDAK: TANÜ ANGAZÜKTSÜBA OJANG



**Taaktsü**

(adj) maaksütsü (shameful)

\* Kidong lembubaji taaktsü mapa lir.

**Tabang**

(n) pei teyi tenu agir kinungbo (brother in law)

\* Benjong shia ozü tabangtem nem mapa inyakdaksür.

### OLONG PAITEP # 6822

	1		2			3		4		5
6								7		
					8		9			
			10							
11										
			12							
13		14		15						16
17										18

**TIPIEN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S \_\_\_\_ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_\_\_\_ hi - (3)
- 16. Akümüli nungi pilar - (3)

### OLONG PAITEP # 6821 TELANGZÜBA

**TIPIEN :**

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

### NAI-A YA METETTER MA



India nung Gopikrishnan Kesavan (27)-i anogo 13 nung bicycle ajanga linük ajunga semogo. Gopikrishnan ya IT worker ka lir aser pai bicycle ajanga 'K2K' route ta ajaba Kashmir nungi Kanyakumari Beach tashi ao. Iba nungtugu lenmang ya 3,641 km (2,262 miles) lir aser pai anogo 13 agia senzü. Iba mapang Gopikrishnan-i teyari kecha magi aser iba tetezü pa sülen chiyungtsü, supply abener mesüra hotel-i anir aoer shinga mani. Pai lenmang nung aliba restaurants aser tea shops nung dang achiajem asü aser aonung anenzükdak mangudang item tesem nungsa yipzuka liasü. Iba atema Guinness World Records ajanga pa nem "fastest unsupported India N-S crossing by standard bicycle" naroküm agütsüogo.

### Arunachal sorkari Minister tem yaritsü atema Advisor 19 shim



**Itanagar, June 18, 2024 (Agencies):** Arunachal Pradesh sorkari minister tem yaritsü atema Advisors 19 tashi shimogo.

Cabinet Secretary Kaling Tayeng-i iba sangdongdang Advisor tem nem emoluments, remuneration, perks mesüra facilities kecha magütsüsü ta jangjatsü.

Honchun Ngandam-i PWD (Eastern and Central Zone-B) Minister atema advisor inyaktsü, Nakap Nalo-i Disaster

Management atema Advisor, MLA Wangling Lowangdong-i Environment and Forests aser Ninong Ering-i Hydro-Power Development reprangtsü.

Maneni, Itanagar MLA Techi Kaso-i Urban Affairs, Land Management, and Food and Civil Supplies Advisor aser Phurpa Tsering-i PWD (North West, Western and Central-A zones), Highways, and Science & Technology atema Advisor inyaktsü shimogo.

Arunachal Pradesh

sorkarisa Rural Works and Sports and Youth Affairs atema Chow Zingnu Namchoom, Home and Education atema Mutchu Mithi, Health & Family Welfare and Commerce & Industries atema Dr. Mohesh Chai, Public Health Engineering atema Pani Taram, Water Resources atema Hayeng Mangfi, Power atema Jikke Tako aser Tax and Excise atema Dongru Siongju nunger Advisor inyaktsü shimba metetdaksüogo.

### Mizoram nung drug anema Core committee ka tentetogo

**Aizawl, June 18, 2024 (Agencies):** Mizoram state sorkari drug khuret anema raratsü aser iba ajanga lanur taküm aika nung kongshio go ta Chief Minister Lalduhoma-i metetdaksü.

Zarkawt nung aliba Presbyterian Church nung drug awareness campaign nung jembidang "sorkari state nung drug miima shibelenba anema rarar. Iba rara nung arogotem

aser civil society organisations-i yariteper" ta Lalduhoma-i ashi.

"State sorkari drug anema core committee ka tentettsü aser parnoki akangakanga inyaktsü aser Mizoram nung drugs samatsüsü osang sangoktsüsü" ta Chief Minister-isa ashi.

"Taküm küm tenzüker ita pungu tsüingda drugs ajanga nisung 41 süogo. Mizoram nung taruba küm 20 tsüingda druga ajanga nisung aika taküm

samatsü" ta Foundation for Drug-Free Mizoram founder & president V. Lalnunthara-ia ashi.

"Onoki Mizoram nung school aser Sunday school ajak nung drug awareness campaigns agiyonga aotsü" ta pai ashi.

Zarkawt Presbyterian Church nung Youth for Christ züngsem noklang aikati iba sentong nung drug mamshitsü tezüngzüktep agia liasü.

### COCOMI-i Amit Shah dang narco-terrorism nung temulung agütsüsü ashir

**Imphal, June 18, 2024 (Agencies):** Home Minister Amit Shah-i June 17 nü senden ka ayonga amenba atema Coordinating Committee on Manipur Integrity (COCOMI)-i ashishitepba metetdaksüogo.

Home Minister-i Manipur tebilemsü adokba onüktem paitoktsü meranger ta COCOMI spokesperson Khurajam Athouba-i ashi.

Amit Shah-i Kuki aser

Meitei nunger den jembishinü asütsü lemtetba ta meshitak lir ta pai ashi.

Iba tebilemsü chichiba onükji Chin Kuki narco-terrorist armed groups aser India sorkar den Manipur sorkar tsüingda lir ta Athouba-i ashi.

Ministry of Home Affairs (MHA)-i Meitei aser Kuki nunger den olemtepotsü aser tensa süngjemdaksütsü merangtsü ta June 17 nü Amit Shah-i ashi.

Paisa Manipur nung yimjung alitsü aser ozüng tiptemtsü atema central forces mapa shitak lemsüktsüsü atema nenshia metetdaksü. Nüngdakra central forces talila yoktsü ta paisa ashi.

Amit Shah-isa ketdangsürtem dang ozüng alema inyaker tem dak tapet mapa inyaktsü aser sorkari Manipur nung tensa süngjemtsü atema tenangzükba lir ta ashi.

### Pasighat MLA Ering-i UPSC coaching atema kaketshirtem yaritsü

**Pasighat, June 18, 2024 (Agencies):** Pasighat West MLA Ninong Ering-i Arunachal Pradesh nung par constituency nungi kaketshir 5 tashi UPSC-CSE coaching atema yaritsü.

"Iba sentong indang nükjidong ya lanurtemi

administrative examination tematiba IAS nung takok angutsü atema lir" ta MLA Ering-i ashi.

Iba sentong atema shimtetba kaketshir shia nem MLA Ering indang 'Educational Development Programme' nungi Rs 1 lakh agütsüsü.

June 22 nü züngsem pungu agi akümba expert committee kati interviews agia kaketshir 5 shimtettsü ta Ering-i ashi.

Tesüiba nunga MLA Ering-i UPSC-CSE, JEE, NEET aser Arunachal Pradesh SSB dena tatidang balala nung kaketshirtem yaria aruogo.

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA**

*Dt. Kohima, the 18 th June, '2024.*

**NOTIFICATION**

NO.DTE/ESTT-2/NEET/01/2024-25/ In continuation to this office notification of even number dated 5th June, 2024, this is to inform that the last date for submission of NEET-(UG) 2024 registration form for Nagaland State reserved seats of MBBS, BDS, BVSC & AH, BAMS, BHMS, BASLP & BUMS has been extended till 25th June, 2024.

No further extension of dates will be made and no form will be accepted thereafter.

**(ER. VIPULHOU LHOUNGU)  
Director**

# N Korea sepaitemi arrtsü adena S Korea-i ai

**Seoul, Aami/June 18 (Agencies):** South Korea indang military-i ashiba agi, North Korea nunger sepaite 20 nungi 30 shi Mongolbarnü linük ana tsüingda arrtsü adena ait, saka South Korea nunger sepaitemi kümdangshitsü atema injang khaloktsüba sülen meyipa ao.

Iba ya Mongolbar anepdang 8:30 ako shi nung ataloka liasü. Demilitarised Zone (DMZ) teyongtsülen North Korea nunger sepaitemi military demarcation line adena South-i aita liasü, ta Joint Chiefs of Staff (JCS)-i ashiba Yonhap news agency sangdong ka ajanga metetdaksü.

JCS-isa, South Korea nunger sepaitemi kümdangshitsü atema injang khaloktsüba sülen sepaitem ya yakta dang meyipa oatok, ta ashiba den parnok asaa arrtsü adena masü asütsü ta amanger.

Hopta ka tejakdanga kasa tatalokba ya ataloka liasü.

South Korea military-isa, arrtsü temeket nung landmine apokba mapang North Korea nunger sepaite aika süogo aser tiyirua yiruogo, ta ashia saka iba lendong ya kodang atalok iba indang memetdaksü. DMZ aser Korean Peninsula nung line of control ya alima nung tesashitiba nüka aliba arrtsü ka lir, kong anatsülen mine tem aika rema tokja lir.

"Arrtsü nung landmine tem apokba ajanga tasüba aika ajangshia arudar," ta JCS-i osangbenertem dang ashia.

North Korea-i November ita 2018 küm Seoul den military dak sendakba nung tenangzüktepba yanglur aliba nungi parnok atsüingintsü ta ashia, aser arrtsü sepaite aser prangbong aser hadir balala talila yoka liasü. Pyongyang-i

military spy satellite ka yokba sülen South-i tenangzüktepba yanglur aliba nungi shilem kar magi kümdaktsüba sülen North-i iba jenjang agia liasü.

Iba sülen arrtsü nung inyakyim tali kümogo aser JCS-i ashiba agi, North Korea-i streetlight aser railway track tem agindar, antitank barriers tem amenokdar aser security akangshitsü atema mine tem remdar.

Russian tir Vladimir Putin-i Pyongyang semdangtsü atema North Korean lenir Kim Jong Un renemshiba mapang tang iba ya atalokogo.

North Korea indang ruling Workers' Party meyong osang kaket Rodong Sinmun Mongolbarnü adok nung Putin-i, taoba küm 70 tsüingda linük ana tsüingda tesendaktep aser partnership tajungba küma odar, ta ashiba sangdonga liasü.

# Chinese Coast Guard-i Philippine Navy officer ka yirutsü

**Manila, Aami/June 18 (Agencies):** Philippines-i Mongolbarnü sangdong ka ajanga ashiba agi, South China Sea nung Second Thomas Shoal anasa China Coast Guard indang rong kati Philippine indang rong ka dak tsükoktsüba sülen navy personnel ka kanga mejungi yiruogo.

"June 17 nü BRP Sierra Madre (LS57)-i supply bener otsüba mapang CCG (China Coast Guard's)-i asa rong dak tsükoktsüba sülen Philippine Navy personnel ka kanga mejungi yiruogo," ta military sangdong ka ajanga metetdaksü.

Shoal, kong rong teraksa ka nung Philippine indang garrison tilaka amenoka lir, iba ajanga ita ishika tsüingda China aser Philippine na mangatettep adoka arudar aser Beijing-i iba tesem ya parnok meyong kümdaktsütsü atema jenjang talila agia arudar.

Iba tatalokba sülen mapang tatsüka dang lir Chinese coast guard-i, Philippines indang re-

supply rong kati parnok tekümdangtsü agütsüba mangai liasü, ta metetdaksü.

Iba rong ya China nunger rong anena aliba tesemi meshidaki aru aser iba ajanga tsüktep, ta Beijing-i ashiba den, iba rong ya Ren'ai Reef anasa ozüing alema ait ta shisem.

"Temzüng ozüing dak ajemdaker Chinese Coast Guard-i Philippines indang rong anema jenjang agiogo," ta kasa sangdong ajanga metetdaksü.

Ajisüaka Philippine armed forces-i, China-i osang agütsüba ya tai ta ashiba den China nunger rong ya ozüing alema Philippines indang exclusive economic zone-i ait ta ashia.

Iba sülen mapang tatsüka lir West Philippine Sea nung Manila indang national task force-i ashiba agi, China nunger rong yagi lendong ataloktsüba inyaksangshi, kong rong dak tsükoktsüba aser atsür aoba densema lir.

"Parnok inyakyim ajanga onok indang personnel tem

lendong nung toktsü aser onok indang rong raksatsüogo," ta parnokisa ashia.

Philippine military-i Mongolbarnü sangdong ka ajanga iba tatalokba dak sendakba nung mezüingbuba casualty report agütsü aser ashiba agi, navy personnel shiba yirua liasü pa aninogo aser takaraba nung temang anepalutsüogo.

Second Thomas Shoal ya Philippines indang asetkong Palawan nungi kilometer 200 shi pilar lir aser China indang anasatiba asetkong Hainan nungi kilometer 1,000 dak tema pilar lir.

Beijing-i South China Sea ya ajunga amai parnok indang ta shia arudar aser iba ajanga Philippines densema Southeast Asia nung linük aika den mangatettep adoker lir.

Parnoki coast guard aser tanga rongtem tzü meita atatsü atema yokogo aser reff aika militarised artificial asetkongtem kümdaktsüogo.

# Molungnen 0



ASOBA: 15.03.34 - TASÜBA: 11.06.24

Ojala Nungshienla (Ungma) shirangba mapang nungi tasü tashi shirnokisa mapang, rongsen, nübu aser sarasadem nung nungita yariogo, nenok ajak dang kanga pelaba lemsateper. Onoki nenok nem meyipa agütsütsü kecha maka saka asen tajung Tsüingremi nenok ajak tali moajangma ta ozü sarasadem.

*Kinungertem.*

# Taoba Ato kilonser Thaksin nem bail agütsüogo

**Bangkok, Aami/June 18 (Agencies):** Chubar kibong mezüingmeshiba ken o nung tai tongloktsüba sülen Thailand nung court kati taoba ato kilonser Thaksin Shinawatra nem bail agütsüogo.

Nüburtemi kanga jangja meteta aliba billionaire atema Mongulbarnü telemtetba agiba ajanga pa anema ken o mejembidang pua mayutsü.

Tang Thailand nung sorkar kumteta aliba Pheu Thai Party den kanga junga sendaktepa alisang Thaksin anema lese-majeste law kübok ken o benoka liasü. 2015 küm osangbener den sensaksemba mapang pai iba chuba yimli indang ozüing tesashi raksaa chubar kibong mezüingmeshia liasü ta prosecutor temi ashir.

"Tanü state prosecutor temi Thaksin Shinawatra anema ken o benok aser court-i iba ken o agizük," ta attorney general indang office ajanga sangdong ka nung ashia.

Thaksin, shibai item ken o kata nunga aibelen masü ta ashir, pa sen 500,000 baht (\$13,580) bond nung bail agütsü aser temelaba makai linük yutsür maotsü totuyuba agütsü, ta court ketdangsur temi ashia. Iba ken o ya August 19 nü ano jembitsü lir.

Arishi küm 74 tain Thaksin ya ato kilonser atema anaben shimtet aser 2006 küm mitkar temi atsüingdoka liasü. Pa küm 15 bendang lima nung jenoka lir taoba küm August ita Pheu Thai party-i sorkar kumtetba mapang Thailand-i meyipa shilang.

Thaksin anema ken o ya yimten yimsüsüba nung sendaktepa lir amai angateter, kechiaser pa ruling party den



tesendaktep tajung lir.

Thailand politics ya conservative military pro-royalist elite aser Pheu Thai aser opposition Move Forward Party (MFP) ama progressive parties tsüingta tsükchitep agi sünga lir. Iba mangatettep ajanga taoba mapang yimti-yimtung nung longkak aita political party tem anentsü, airport shibang aser mitkar temi sorkar atsüingdoka Thailand rongsenketzüng tia kanga mejungi kumdaktsü.

Sorkari par opponent tem dak atsüktsü mechi lese-majeste laws tali amshir ta ashir.

MFP ajanga ozüing yanglutsü mechi nübuyimba atema linük indang election commission ajanga iba party anema ken o benokba ya Constitutional Court ajanga July 3 nü jembitsü Mongulbarnü telemtetba agia liasü.

MFP yagi taoba küm election nung takok angu, saka conservative politician temi sorkar mekumtetdaksüi nokdanga ayu, anungji chuba yimli atsüingdoktsü meranga temzüng yanglutsü merangba nung tamakok ajurua liasü.



Gaza Strip nung Israel aser Hamas tsüingta ceasefire alitsü takhangba agüja June 17, 2024 nü Jerusalem nung longkak aitdang tangokba noksa nung angur.

# France aser Slovakia nati takok angu



France asayar goal agutsur pelatepa noksa nung angur.

**Aami/June 18, 2024 (Agencies):** Hombarnü Euro 2024 nung France aser Austria na asaya France-i goal 1-0 agi kokogo. Asaya nung Maximilian Woeber-i own goal ka idaktsüba ajanga par team tamakok ngua liasü.

Duesseldorf nung asaya mezüngbuba shilem tembangtsü minute tenet anunga lia Mbappe-i metsüba ball ka Woeber dak tsükdaker goal ai aser iba ajanga France nem takok agütsü, shirnok iba asayamung akoktsü imlaba team rongnung ka lir.

Ralf Rangnick lenisüba nung Austria team tang tajungba asayadar aser parnoki asaya tepeyong France tem nem timtem agüja liasü.

Ajisüaka tia maka France nunger striker Mbappe asaya tatemlen box telung nung Kevin Danso den tsüktepa sülen teni

raksa liasü. Iba sülen pa melena Olivier Giroud asaydaksü.

Group D nung France aser Netherlands napronglai point asemsem ngua lir. Netherlands-i Deobarnü Poland goal 2-1 agi kokogo.

France team taruba asaya Hokolbarnü Leipzig nung Netherlands den asayatsü aser Austria pur Poland den Berlin nung asayatsü.

Kasa asayamung Group E asaya ka nung Slovakia-i goal 1-0 agi Belgium kokogo. Asaya nung goal ka ya Ivan Schranz-i idakja liasü.

Francesco Calzona-i aniba Slovakia team ya FIFA world rankings nung tasembuba jenjang nung aliba Belgium dang nungi jenjang 45 agi tekübokba nung lir.

Asaya nung Romelu Lukaku-i goal idaktsütsü atema maongka aika angu saka

magitet. Asaya tatemtsü lia minute 85buba nung pai goal ka idaktsü, ajisüaka VAR asadanga sülen iba goal ya magi kümdaktsü.

Hombarnü kasa pool nung Romania-i goal 3-0 agi Ukraine akokba sülen Group E nungi shiba qualify asütsü mejangjai kümogo.

Belgium team nung asayar tajung aika lir, ajisüaka parnoki asayamung tongtibangtem nung junga masayateti arudar aser parnok taoba European Championship ana tashi nung quarter-finals nung tsükogo aser 2018 World Cup nung tasembuba jenjang nung tembanga liasü.

**JUNE 19**  
 Croatia Vs Albania 6:30 PM  
 Germany Vs Hungary 9:30 PM  
 Scotland Vs Switzerland  
 12: 30am (June 20)

# East Bengal FC-i David Lalhlansanga alizükogo



**Aami/June 18, 2024 (Agencies):** Super Cup champions East Bengal FC-i Mongolbarnü sangdong ka ajanga India nunger forward David Lalhlansanga den küm asem atema tenangzüktepa yangluba sangdongogo.

India nunger lanur striker tem rongnung David ya tajungtiba ka lir aser pa taoba küm Calcutta Football League aser Durand Cup nung goal timtiba idaktsüba asayar liasü aser Mohammedan Sporting Club puri mezüngbuba I-League akokba nunga pai tongtibang shilem agi.

"East Bengal ya club tulu ka lir aser India ajanga nung fan

tem lir. Ni asaya kanga meimba fan tem matsünga asayaner," ta David-i ashi.

Head Coach Igor Stimac-i, World Cup Qualifiers nung India team tatembangbuba asaya ana atema David-a shima liasü saka pa khen danga masayashi.

"Ni India camp nung Mahesh, Nandha aser Lalchungnunga nunger den mapang intokogo. Parnoki ni kanga yarir aser ni tajungba akümtsü atema ajungmesor. Ni club atema takokba tashi tajungtiba asayaner," ta paisa shisem.

East Bengal head coach Carles Cuadrat-i ashiba agi, "David ya onoki mapang talang

ka nungi alizüktsü meranga aruogo. Pa ya Durand Cup aser CFL nung goal timtiba idaktsüba asayar liasü aser iba ajanga ni atsüa aru. Iba mapang nungi onok tarutsü atema pa ya aginüa liasü. Pa ama asayar tajung ka densemba atema ni kanga pelar."

David ya Mizoram nungi lir aser pa mezüngbuba Aizawl FC youth team nung asaya aser iba sülen 2019-20 season nung Aizawl indang first team-i aniketa liasü.

Season asem asayaba sülen David 2023 küm Mohammedan Sporting Club-i ao. ASC nung adenba sülen arishi küm 22 tain asayar yagi Durand Cup nung kanga junga asaya-a asaya asem nung dang goal trok idaktsü aser Golden Boot award ngua liasü.

Pai maneni kanga jung asaya CFL nung goal 21 idaktsü aser Mohammedan puri iba asayamung akokba nung tongtibang shilem agi. I-League nunga pai goal pongu idaktsü aser assist ana süja parnoki I-League akokba nung teyari agüja liasü.

# ICC Women's ODI batting rankings: Smriti 3bubai tuogo

**Aami/June 18, 2024 (Agencies):** India tetsür cricket team vice-captain Smriti Mandhana, Mongolbarnü sayaba ICC Women's ODI batting rankings nung jenjang ana tejakdangi tua tang tasembuba nung lir.

South Africa den mezüngbuba ODI asayaba mapang Mandhana-i run 117 yangluba ajanga India team-i asaya run 143 agi akokba nung teyari tulu agüja liasü. Lai tang mezüngbuba linük nung century ka yangluogo.

Point 715 anguba sülen left-handed opener ya tang Sri Lanka tsür Chamari Athapaththu aser England tsür Natalie Sciver-Brunt na sülen tasembuba nung lir. Natalie-i taoba Ita Pakistan den asayaba mapang out mesüi run 124 yangluba sülen temaba jenjang nung la jenjang

yanglushiogo. Kasa mapang nung India tsürtem rongnungisa all-rounder Deepti Sharma jenjang asem tejakdang tua 20buba tongtetogo aser Pooja Vastrakar-a jenjang asem tejakdangi tua tang 38buba nung lir.

Vastrakar-a ODI all-rounder rankings nung jenjang pezü tejakdangi tua 18buba tongtetogo. ODI all-rounder tem rongnung South Africa tsür Marizanne Kapp maneni temaba jenjang nung lir.

South Africa den mezüngbuba asayaba mapang Deepti Sharma-i ball kanga junga ona wicket ana tashi agiba sülen la ODI bowling rankings nung pezübuba nung lir.

ODI bowlers' rankings nung England tsür Sophie Ecclestone maneni temaba jenjang nung lir.

# Ons Jabeur Olympics masayatsü



**Aami/June 18, 2024 (Agencies):** Tunisia tsür tennis asayar Ons Jabeur-i la taruba 2024 Paris Olympics nung masayatsü ta shiogo. Asayartem court balala nung küm tepeyong maziungi dang asayar asünung, yirutsü ana nung aliba shisabulua bilemba ajanga iba telemtetba agiogo.

Jabeur-i iba asayamung nung shilem magitsü telemtetba agiba kuli tongtibangbaji asayamung French Open asayaba clay court tem nung asayatsü aliba ajanga lir.

French Open nung quarter-final tonga asaya-a iba ita tetenzüklen clay court season tembangba sülen world no. 10 asayar ya tang grass court nung asayatsü aliba asayamungtem atema renemdar aser Olympic tembangba sülen mapang tatsüka dang lir US Open hard court tem nung asayatsü lir.

Asayaba tesem kanga kara melenshiba ya asayartem asoshi kanga tasak lir. Court shia nung

asayaba yimya balala asür aser iba amaji pei temanga court den peta melenshitsu nüngdaker. Iba amala temelenshitem ajanga movement patterns, footwork aser tetsü balala aser talisa temekok dak kongshir.

Jabeur-i la indang medical team den sensaksemba sülen iba telemtetba ya agiogo, kechiyong clay court season tembanga asayaba sülen kanga kara asayaba tesem melenshiba ajanga la temekok yirutsü ana nung lir.

"Paris Olympic nung asayatsü atema kü indang medical team den sensaksemba sülen onoki asayaba tesem kanga kara melenshiba ajanga kü temekok yirutsü aser iba ajanga season tepeyong masayatetsü akok ta tsübua bilemba ajanga iba telemtetba agiogo.

"Ni asayamung mashi ka nung linük tenüing nungi asayaner, ajisüaka ni kü temang atema bilemstsüla," ta lai shisem.

**BILEM DANGANG**  
 "Akoktsü ta amangba ajanga lenmang lapoktsür."